

四庫全書

集部

欽定四庫全書

元風雅前集卷四

元 傅習 編

李伯宗

送邵天常歸山

搏風徑擬九霄飛志業誰知與願違
虎豹關深書未達
鷄豚社遠夢先歸
香侵客路花方盛
綠滿家山蕨正肥
去後且從閒處樂
微書有日到柴扉

柳道傳

八月二日大駕北巡將校獵於賽音布拉克詔免漢
官扈從南旋有期喜而成詠

天子龍飛啟聖時乾坤闔闢載清夷幸從在鎬成周宴
重喜臨邊舉漢儀御宿常時嚴虎衛吉行惟日望鸞旗
詔恩許免陪驂乘却愧長楊賦未奇

還次桓州

塞雨初乾草未霜穹廬秋色滿沙場割鮮俎上薦黃鼠
獻獲鞍間懸白狼別部烏桓知幾族他時稽落是何方

長雲西北天如水想見旌旗瀚海光

過長城

道德藩墉億萬年長城漫與朔雲連秦人骨肉皆為土
漢地封疆已罷邊飲馬窟深泉動脉牧羝沙暖草生煙
神京近在玄溟北九域開荒際幅員

京城偶成

毳幕承空挂綉楣綵繩亘地掣文霓辰旗忽動祠光下
甲帳徐開殿影齊芍藥名花圍簇坐蒲萄法酒拆新泥

御前賜酺千官醉坐覺中天雨露低

同楊仲弘應舉和袁集賢上都雜詩九首

出塞行瞻日趨朝喜近天離宮來苑囿馳道絕風煙
水巡非遠峒山歷更綿甘泉多法從獻賦憶當年

雨水漸衣黑雲沙際日黃烟開纔黯淡日出已蒼涼
徇俗高簷帽清心小篆香端居萬里念蕙草惜微芳

謠俗隨方異溝途隔舍迷醺人唯馬湏勸客有駝蹄
殿角孤花靚城隅雜樹低天涯中夜舞如意昔曾携

天潢猶白白雲幕故青青積潦摧車軸高風墜雁翎宮
塗丹赭堊殿戶紫金釘女樂蓬萊秘哀簫動杳冥

幄殿層雲陣轅門積雪峯奇鷹皆戴角御馬盡飛龍瀚
海將臨幸云亭望陟封青丘大羽獵有事待玄冬

曹務唯章句官規自法程齋扉侵雨潤宴兒得風清歷
歷三刀夢行行萬里城明年遂耕隱深仗酒為名

經遊還絕塞際遇復清朝大暑無蒙綬輕寒已御貂盤
空虀屢薦觴至酒頻澆貧病諳為客何慚帶減腰

公子青絲轡王孫綠韉車宴酣風小定舞破日西斜手
擲宮中果神行海上槎築鄮母自厚儉德不期奢
水草方方善弓弧戶戶便合圍同婦女從戍到曾玄雪
毳千家帳冰瓢百眼泉浚稽山更北畏望斗光懸

送臨川謝有源赴閩醫提領

一路青山荔子叢華山西望粵西東家風蘭玉庭階上
宮事參苓藥籠中鷓首去乘潮浪白蠅房催薦酒醅紅
福州自是炎蒸少臘雪飛花落半空

題有源圖卷後

官章文學範相同摹印書兼篆刻工猶是古人傳信息
雕蟲元不在揚雄

贈黃伯中從臨川吳先生卒業因之奉簡

夫子祠垣舊巴山闕里門具瞻誰可並友愛益宜尊往
卒諸生業行穿百谷村亂流黃濁湧迎宿綠陰繁想到
趨函丈承聞服緒言心將經義治理並聖詮存藻繪終
迷質條枚實自根須無遵近軌會有企前轅伊闕如堪

攬河汾欲併吞道初由已致舌豈待人捫正要薰陶學
全稀色笑溫歸裝當捆載饋館且盤飧羨爾方朝旭慚
予未及昏仰懷駒皎皎深感兔爰爰瑤席今承間緘辭
莫憚煩庶幾薦鳳背兼得嗜龍螭鯁鱗何勞祝因茲寄
不謖

陳濟淵

龍額山

巔崖突出衆峯前隱躍潛龍枕爪眠怪木秋凋露頭角

寒泉春湧鎮龍涎
身橫雲外三千尺
眼看人間幾百年
莫待始皇驅入海
早升雷雨上青天

海青

怒挾孤風海外來
脩翎如劍斫雲開
潛身陡縮千尋起
得意雄攀上點回
萬里老拳無脫腦
滿鞴英氣不凡材
山後野雉休回首
神物無心到草萊

萬壽山

萬壽山頭尺五天
空同直下小如拳
五更霧冷乾坤濕

六月風酸甲子偏細草已肥燕地馬奇兵先鎖漢江船
行人莫問征南事墮看蘇杭在眼前

馬伯庸

寄邵允文

故友經年別如今髮白無清秋江鷺浴長夏野猿呼客
舍栖書冊齋頭具筍蒲知賢不能薦羞澁望東吳

南征

積雨關河濕今朝日始晴浮船下夜瀨覓酒近春城鵝

鴨將雛出牛羊傍母行獨憐無侶客萬里又南征

寄題杜隱居忠學齋

徵君家住武夷山白鶴玄猿夜叩關船泛清冷凡九曲
屋分丹壁只三間世人往往知名姓仙子時時定品班
孔壁秦灰天未喪幾多魚豕待重刪

桃花馬

白毛紅點巧安排勾引春風背上來莫解雕鞍橋下洗
恐隨流水泛天台

琉璃簾

吳儂巧製玉玲瓏
翡翠蝦鬚迥不同
萬縷橫陳銀色界
一塵不入水晶宮
月華遠射離離白
燭影斜穿細細紅
相隔神仙纔咫尺
靈犀一點若為通

聶古栢

題韓文公祠

嶽竒海怪早相知
何事中朝未可歸
佛縱有靈那在骨
僧如得道又無衣
符分臺峽天終定
福近宮牆意更微

俎豆荒涼誰繼廩摩挲石刻重欷歔

過采石

采石江頭秋月白蛾眉亭下灘聲咽綉衣玉斧曉霜寒
同是天涯苦行客酒仙一去海生塵青山玉尺埋衣巾
清江白鳥自今古岸草汀花空復春我欲御風遊八表
醉裏高情覓三島閭闔雲深不可攀回首江南數峯小

九華山

一名蓮花峰在貴溪

江上青芙蓉遙遙隔秋浦九莖風露寒萬壑烟霞古瑤

草含芳春青松立亭午安得一把茅移家白雲塢

鄱陽道中

江上秋風吹斷鴻江頭開遍木芙蓉幾家籬落依紅樹
萬壑烟霞鎖翠峰南國風光一盃酒故園魂夢五更鐘
舉頭日近長安遠閭闔雲深第幾重

九日鄱江里同行諸公

滄浪木落塞鴻飛佳節芝山酒一卮黃菊且陪今日醉
鐵冠不受晚風吹滕王閣上雨雲黑戲馬臺前草樹衰

何似淵明千古意一篇清絕去來辭

琵琶洲

昌國寺前楓樹秋琵琶洲畔暮雲愁
沙頭潮落灘聲急疑是潯陽淚未收

鄱陽和程世民巡警官

年少將軍意氣雄乃翁憲府舊乘驄
魯中詩禮有庭訓江右衣冠多士風
玉樹青蔥秋色裏明珠炫爛月華中
滕王閣上重回首後夜相思寄別鴻

望玉筍山弗克登覽留詩萬年宮

西南山水窟玉筍號奇絕羣岫來陂陀孤峰立撐嵒邃
洞烟蘿青危澗幽泉咽正是南昌尉于茲悟仙訣一覽
快心目洗滌中腸熱嗟予敢告勞馳驅待環轍五月登
武夷清流清且冽扁舟九曲中兩崖千尺鐵歲暮復何
之清江夜飛雪山靈似笑我身世苦羈紲願言解塵纓
林泉養吾拙

春遊

桃葉渡頭春水生長安橋上草長青百年深向花時飲
贏得城南幾醉醒

清遠縣尹楊觀政有奇蹟復能詩文民僚服其
化士大夫過者靡不稱頌故贈此加勉焉

玉節星輶下嶺南萬山空翠雜烟嵐傳聞清遠多佳政
花滿春城月滿潭

風流文采揚忠肅南北雄奇古峽山怪底蠻江無語鳥
絃歌終日水雲間

梅嶺題知事手卷

黃金臺上客大庾嶺頭春如是無詩句梅花也笑人

題碧澗堂

在瑞州鳳凰山傳李八百女弟明香真人故

居舊有迷仙洞上刻仙容

聞說明香早學仙華堂突兀故山顛四圍亭檻青雲上
兩岸樓臺綵水邊龍虎丹成知九轉鳳凰飛去已千年
旌旗八百俱塵迹惟有坡翁麗句傳

萬安縣邂逅一樓偏高明舊有公畧張憲僉和
劉素庵一詩用題於左

五雲閣上北風寒十八灘頭疊亂山庾嶺一枝春信早
龍泉三尺土花斑蠻烟瘴雨霜天曉畫戟清香晝日閑
倚遍欄杆動高興一聲道唱水雲間

次韻宗道御史過峽

蒼崖巖嶂奔東流玉節招搖漾彩舟雲鎖千山蕭寺古
霜清百尺瘴江秋白猿一去空長笑驄馬南來得壯遊

聞道遐荒歆帝力
家家麥飯老林丘

番禺道中

玉斧飛霜大庾南
萬松蒼翠洗烟嵐
雲迷梧野山羅戟
月滿韶江水潑藍
椰子漿寒殊似蜜
荔枝香暖絕勝柑
中朝者舊如相問
鳥語啾啁正未堪

和元帥伊埒呼圖克公子強橫竟以駐敗同憲岳公齊高王馬二憲掾實共事云

好雨崇朝洗瘴淫
越王臺上一登臨
鰐魚已逝白波靜

遊鯢變化滄溟深六祖泉臨千歲水百蠻航貢五方金
九重貝闕雲深處萬里孤雲寸草心

題叅政高公荒政碑

廬山插天千仞青明公高節逾稜層西江月冷秋無際
明公此心清徹底厭渠道上豺虎多手搏不待弓與戈
前年魃虐徧南國饑者以充僵者立洪州父老遞道傍
上書乞留涕泗滂豐碑大字記荒政要使遺愛如甘棠
我來觀風聞此語未見儀容心已許願公從此召赴中

書堂早為四海蒼生作霖雨

龍麟洲

陳平章席上題琵琶亭

老大嫦娥負所天
忍將離恨寄哀絃
江心正好看秋月
却把琵琶過別船

春日即興四首

一夜東風到海棠
千桃萬杏不成粧
老夫無分穿紅海
日拂銅瓶浸錦香

二月桃花煖欲然
牆南美錦正芊綿
底須更覓逃秦叟
遶屋春紅卽洞仙

病來桑扈老嬾姍
瘦策東風興未闌
野菜黃雲山薺雪
風光何處不堪看

枯藤處處領春華
遞莫東風顫帽紗
點破蕪菁黃世界
一枝香雪小梨花

赤壁

踏呂摧袁虎視耽
阿瞞氣勢捲江南
磯頭一霎東風轉

天下江山自此三

葉友竹

名留字景良著聖德延壽錄為萬世師法

資治通鑑

君鑒君兮臣鑒臣世間何有敗亡人若還鑒古猶為遠
夏后何嘗可鑒殷

讀古史治亂

睿智聰明允執中萬幾四海一家同奈何生長承平後
聞見無非只後宮

杜竹處

惠山寺行殿

渡江五馬竟忘歸
愁見年年雁北飛
千里版圖非故國
六朝基緒幾危機
烟藏經葉閒僧錫
風落松花上客衣
前代衣冠已塵上
空留碑碣枕斜晖

題鄉僧智安石山磊落亭

磊落如痴也似頑
精神半在嵌岩間
鬼工驅得平泉石
吟客來逢飯顚山
虎伏不驚飛將怒
羊蹲誰識牧仙閒

詩成个个頭應點師亦拈花為解顏

元風雅前集卷四

欽定四庫全書

元風雅前集卷五

元 傅習 編

安竹齋

送白雲平章

舟人停棹酒停斟
試聽筵前送客吟
離恨早知如此苦
交情不合恁為深
白雲境界三更夢
紅葉園林兩地心
從此草茅亭上客
抱琴何處遇知音

明普彥

題商山四皓圖

劉氏何如呂氏安
尺書便爾闕重關
空將鬢雪驚隆準
不道啼紅慘下顏
鴻鵠聲寒悲曉殿
紫芝香冷怨秋山
千年猶昧深根術
又落巴童摘樹間

文子方

次元復初韻送虞伯生代祠江瀆之二首

成均十載宛遺經
未識沙墩長短亭
旌旆曉霞穿化日
文章秋月映華星
鳥鳴春晝岷江白
鴈沒天低隴樹青

四海車書今混一摩挲劍閣重鐫銘

出宿春城宿霧低閨人老眼似層梯功名愧我蠅鑽紙
文采憐君玉在泥蜀道連雲春繫馬巴山踏月夜聞鷄
贈言知笑瀛洲客冷落梅花日又西

贈別任毅夫御史行臺陝西

金天行秋河漢涼星軺夜起尚書郎隴山晴樹熙化日
燉煌埜道霑飛霜天邊鷺鶴意自遠草間狐兔無苦傷
大夫樹業方如此探別不用愁中腸

和寧致陶幽懷

時雨息氛翳高林嘒風蟬端居愜孤尚圖書靜當軒涼
颼薄櫺戶微爽生簡編客來聊與樂客去自復眠徜徉
永今夕庶以全吾天

送馬伯庸御史奉使關隴

聖朝啟文運同軌來無方夫君起天闕崛起千仞翔脩
辭陋史漢高步追黃堂乃祖尚書君樹立何堂堂昔在
帝世祖榮身事戎行風雲一朝會奕世傳芬芳矧君摧

高科有業未易量斯文繫政教治忽慎弛張世豈無勇者舍君吾何望勿為守鉛槧局束徒苦傷餓屋京城居去君百舉趾聞君起冠豸僮走亦欣喜況當遠于征無言詎能已朝風號空桑衆草日披靡河關尚瘡痍聖度乃弘偉翳彼涵大休能不懷愧恥艱危見臣節維持賴風紀溫言表遺忠生氣凜不死乃知烈丈夫豈獨魯連子

題楚山春曉圖

荆門雪霽江樹芳
巫峽冉冉愁雲長
山猿杜鵑叫落日
風灑露沐何蒼涼
六龍從東來
曉氣開扶桑
天高雨絕
人事變解環結
佩空相望
渚宮西
溼連三湘
畫中隱
隱聽鳴榔
安得置我棲
其傍
為君一曲歌滄浪

袁伯長

送華山隱者

黑髻祠官佩水蒼
萬松深處响琳琅
黃柑有法能為酒
紫朮無饑可當糧
招鶴舞空山
月冷撥龍吹
雨海風涼

瑤池欲問長生訣
碧澗研朱寫綠章

次韻呈周儀之虞伯生

英英雲中君
含思歌太乙
迴鸞舞天葩
流粲曉莫述報
之不成章
玉雪耿素質
臨風發長謠
庶以永今日

昔學空岩居之人
怒且怠
哀猿離山狄
驚笑欲我害
夫
隱人所藏別之
空悵慨桃源
悶深竇亦復知
晉代

道逢學仙人
御氣不飲酒
我笑初無言
彼已嗔我否
哀哉守其愚
繫石猶在肘
冥化隨悲風
淪淪骨不朽

羲娥挾雙轡冉冉若見迫丹臺嗽雲霞瓊莖生尺宅控
搏無須史詭幻已千百慎此陰陽機逃虛脫其厄

竒樹生南薰清坐彈五絃涼風邈永古白雲赴蒼烟世
故日已偷俛仰隨歲年折腰倘為酒猶足青簡傳

少年恣青雲歡至無復戀一為關河行常恐不得見新
雁雲中來飛飛落南遠歸心耿無寐寒更促浮箭

次韻送友教授閩中

鬱鬱太古樹叢生散珠玕明時炳陽德寥落歛歲寒天

風西北來凍海繁層瀾芳朽各有性盛衰誰無端寬寬
氷上履黯黯塵中冠宿志不得野奮飛戢其翰伊南蹇
一士羈鴻河之干手持大雅篇八音佐王官墻陰卧朝
日薄飯衣滿盤邂逅喜我同金石生肺肝出處非故意
低徊耿相看閩山渺雲海東望道三韓居夷聖有在取
琴為君彈

送邵元道

仲連匡世姿揮手却秦軍掩袂停白日登車抗浮雲射

書誠草草孤城死生分辭榮敦厚俗矯抗離其羣

虞卿舌轉九揣事精微茫事危見交態窮愁名益光黃
金散逝水白璧凝飛霜丈夫有定志得失非豫防

梅生一尉微喋喋正天紀洗心洞玄化削迹無妻子龍
變孰為馴蟬脫乃真止松迴風泠泠水落石齒齒

襄陽孟浩然拂衣歸故山放浪岩壑深流咏遺人間舉
袖林花落擊節江鷗還羊公何墮淚水深日潺潺

送世茂許省掾歸武昌

岷江下奔流日夜東南趨艱虞六十載蜀客無完居纖
脩掛晴練五老為之廬招彼素人心蒼翠垂流珠我我
銀臺公懷寶耿不攄青桐摧孫枝下此佳鳳雛絢爛五
色翼披霞表亨衢清者冥鴻遠逸興蒼鷹俱食竹戀苦
志餐風養真腴誓將八極周覽得為真符歲月諒有盡
雲端復躊躇躊躇固吾事荏苒悲征途

蒼莽鷗鷗洲日沒楓葉赤昂昂處士根蔓草化為碧之
士輕且儼之人何急窄至今千載下投筆懼鋒鏑銀城

太古雪俯仰一消釋雍容詩書節浩氣烈金石不盡登
臨意寒波淨如席相逢各萬里末契淪夙昔咿嚶語未
罄征雁起暝色淒涼衣冠聚山海窮畢弋翳翳桑榆老
人物渺可識停驂望前坡去馬記初驛

歐陽元功

延祐二年二月十七日侍宴北省

臣本江南一布衣恩榮今日及寒微合躔列漢光相射
湛露迎陽晝未稀仙醞飲來生羽翼宮衣留得奉庭闈

酒闌車馬如流水回望紅雲遶闕飛

題孫氏壽慶堂

孫母歐陽九袞登外家譜牒自廬陵高年備養人俱美
同姓升堂我未能好客郎君深巷轍讀書稚子小窓燈
朝廷屢賜尚方帛更待迴鸞織誥綾

題澧州謝家建通濟橋

慶雲龍日護雲根玉樹薰蕕接澧沅太傅功留召伯埭
相君心競謝公墩已誇蟠螭綿今古猶羨封胡偉弟昆

珍重盧溝溝上月時隨車駟勞于門

過洞庭二首

白沙隱隱見金鰲殿閣憑虛結構牢天水渾融浮太極
神人幽顯隔秋毫龍堂深閤靈栖冷象緯低垂客枕高
欲作廟堂迎送曲杜蘅碧盡離騷

媧星搏玉擲虛空屹立君山面孰雄一畫犧圖天地骨
九江鯨觀鬼神功裾飄帝子蒼茫外樂奏鈞天瀕洞中
頗恨當年鄒魯客觀瀾未到楚諸熊

夜宿寺前農家

漢南旅店已星稀倦宿田家帶落暉
蕭寺依山聊復爾鄴侯送酒是耶非
風餐并覺涼生飯露坐俄驚月在衣
老子漫遊吾漫送登山臨水憺忘歸

西明道人每一相見去必求詩余亦不能却

武昌堤上水雲身三十年來識道人
只為謾遊相見少故知臨別贈言頻
憧憧車馬紅塵老靡靡江山白髮新
邂逅一回詩一首錦囊千百未為貧

寄諸弟七絕

長樂鐘聲拆號時三台八座列參差
自憐手把天瓢水一滴鄉關不得私

聖主宮中遊幸疎日臨閤閣看芝儲
今朝蘭省初開試清曉玉音催著書

省垣東畔至公堂十五年前戰藝場
飽食大官無補報兩科來此校文章

御史承差鎖院門使臣傳語出天閤
試官被命連鑣入

同榜三人入謝恩

仁廟初科射策郎如今斑白殿朝行東風昨夜聞歸雁
夢遶江南烟水長

薊門城下過堦塔一一人通竈間今朝送客又還入
那忍更投名利關

別駕祠前雪水深弟兄沙上把離樽三年不洗來時褐
要看淋漓別酒痕

早朝

扶搖九萬透雲霄鳳闕龍池步步瑤
駝背負琛金絡索
象身脩駕玉逍遙衣冠俯伏傳呼岳
干羽低徊看舞韶
湖海布衣瞻盛事他時田里夢天朝

杜清碧

與趙子昂集賢為壽

東觀道家蓬萊山神人來往乎其間
銀鈎勢壓蛟龍榜
玉佩聲聞虎豹關秋露滿天濡綠髮
晨光出海曜朱顏
金函更注長生錄林下種竹已斑斑

送趙編脩

往年初記抵京師
正類機雲入洛時
未識鰲頭分赤管
先傳馬首控青絲
瓊林舊醉家家酒
金剎新題處處詩
此日揚州歸去路
錦衣光彩照城池

寄題周待制悠然閣

大江之東彭蠡南
周家高閣與雲叅
秋風猿狖啼青嶂
夜雨蛟龍起碧潭
繞屋千叢生杞梓
通簷百尺長攬柶
何時共此登臨樂
指點平川得縱談

真州賈生索賦孩兒茶

吾聞孩兒茶始來自殊方古人譯其名和以龍麝香賈
生得妙訣品製非尋常清晨待遣我今我試與嘗味腴
甘且美頓洗葵藿腸惜無瓊瑤報裁詩謾誇張燦爛黃
金芽錯落明月章波浪盤蛟螭雲霞迴鳳凰好將龍鳳
餅裹以玉雪囊持之獻天子補益未可量能令齒頰生
玉液却回麴蘖升明光

諸公以懷李白詩分韻送李茂遠後以酒字索

賦遂綴五言一首

漳江水遶遶民俗多雜揉李君專檄來號令肅巡振遂
令方家市安集日豐阜春風有歌姬夜月無吠狗築堤
捍水災皆自將軍手至今此邦人稱謂常在口我來自
京師始得一聚首經過日以數言論竟開剖有如濟世
方乃爾困升斗孰云勞積多反使歲月久方今天子聖
賢知在左右銓曹每推擇往往雜瓊玖此行看薦進直
入紆組綬莫負平生心要使斯民壽豈敢為贈言裁詩

作孟酒

送李伯循歸山中

已聞盤谷最深幽，便欲從君遂此遊。
春氣和柔朝採藥，秋風清徹夜乘舟。
岩花冉冉難留客，汀草纖纖獨倚樓。
楊柳新條不堪折，只須買酒喚離愁。

和楊仲弘

老來自愛黃叔度，少日空期魯仲連。
高卧獨無田二頃，曳裾誰有客三千。
滄江渺渺浮鷗鷺，白日翩翩換歲年。

只憶江東楊少尹
劇談終夜不須眠

楊仲弘

送虞伯生赴召

幾年簪筆侍明光
共取才華補衛郎
祀事必稽周典籍
頌聲多假漢文章
雲垂迥野鳴鞘遠
月滿高城下漏長
縱獵合祛誇盛美
願言作賦繼班揚

送朱澤民之京師

懷山挾海莫京師
氣勢紆餘盡北陲
雁度寒雲秋色遠

鵲鳴宮樹曉光遲
四方英俊皆來萃
一代經綸屬有為
君有長材希屈賈
好將詞賦重當時

送彭萬里

平居鄉鄙係瞻聽
遠涉京畿近寵靈
席底波濤秋淼淼
枕前星斗夜熒熒
宵如龍劍重藏匣
誰識牛刀始發硎
將相與人殊勢分
祇應雙眼為君青

擬辭京師

囊衣托載道傍車
人事匆匆歲欲徂
風雨五更雞亂叫

關河千里雁相呼
蕪菁散漫根猶美
桑柘蕭條葉半枯
却上高丘重回首
五雲繚繞帝王都

次韻陳子仁黃河

禹功䟽鑿實憂勤
宇內山川自此分
元氣渾淪通地脉
孤光迢遞貫天文
母金伏玉秋當孕
陰火潛淵夜欲焚
萬里窮源何日遂
片帆西上破層雲

早朝

掖垣迢遞到城回
魏闕差我此日開
赤帝會筵霄仗引

朱輪爭道曉鐘催三泉忽報藏金甲萬歲猶聞獻玉盃
樂奏象箭從此畢小臣思見鳳凰來

錢塘懷古

斜界鈎陳通大道中分魏闕對層巒雲生殿上金爐暗
露下庭前玉井寒江漢飛龍俄杳杳滄溟泛鷗竟漫漫
中天會合寧非數坐見蒼生奠枕安

山回禁禦入雲長無復陳兵衛兩廂千古金鐘埋野草
萬年珠樹落秋霜龍文不徙陽人聚烏篆終歸軹道傍

九市塵埃來滾滾一江風浪去茫茫

西湖清濁自天開鴻雁驚日往來黃道星辰環太乙
紫雲宮殿擁蓬萊能文競奏王褒頌獻壽深傾阿母盃
九域輿圖今混一百年耆舊自興哀

化人宮殿被層阿棟宇高低日擁波翠石文章題日月
寶珠光燄燭山河空桑說法黃龍聽貝葉繙經白馬馱
誰謂一無超衆有抵今塵上重來過

宗陽宮中秋對月

老君壇上涼如水坐看冰輪轉二更大地山河微有影
九天風露寂無聲蛟龍並出扶金榜鸞鳳雙飛載玉笙
未信弱流三萬里此身今日到蓬瀛

九月

御氣排空寶扇開金衣照日近臣來絲囊已進千秋錄
黼座還稱萬壽盃王子吹簫雙鳳舞羲娥攬轡六龍回
侍臣此日沾恩賜散作祥風遍九垓

元風雅前集卷五

欽定四庫全書

集部

元風雅前集卷八

六至

詳校官通政使

臣

夢吉

助教臣常循覆勘

總校官庶吉士

臣倉聖脉

校對官中書

臣范來宗

謄錄監生

臣龔

果

欽定四庫全書

元風雅前集卷六

元 傳習 編

楊仲弘

東湖即事四首為王侯本齋賦

朝來千騎出城闌為向東湖踏早春
素練褰林雲氣薄明珠穿草露華新
山花獻笑開簷畔海鳥忘機戲水濱
記取當年賢太守及時為樂與斯民

夏月湖中爽氣多南風疊疊卷長波
漁翁舟楫衝蘋藻

游女衣裳擘芰荷
膾切銀絲嘗美味
腔傳金縷換新歌
君侯用意仍深遠
即此光輝豈減磨

暫停麾蓋擁輕舟
此日湖山屬暮秋
采采黃花登几案
離離紅樹散汀洲
傾壺浮蟻杯頻竭
下箸鮮鱗網乍收
莫向錢塘誇往事
白蘇未許擅風流

雲氣低藏十萬家
東湖飛雪又交加
玉禾舊布仙山種
瑤樹新開帝所花
但聽兩岐歌瑞麥
何勞八月泛靈槎
侯門自有相如客
賸賦高車後世誇

九日別友人

客中佳節罷登高獨立淒涼感二毛
紫陌泥塗秋汨汨黑山風雨夜嘈嘈
幽人後有觀魚樂壯士慙無汗馬勞
得失古今俱一律惟應痛飲讀離騷

次田師孟西曹卽事韻

隱吏重來右掖初清明時節亂花舒
霧迷黃閣霏霏重雨散彤庭點點疎
李耳舊藏周典禮蕭何元得漢圖書
經綸事業煩公等要使皇文日粲如

題鄧善之袁伯長諸太史

詔編國史有程期正是諸郎倬直時虎士守門宮杳杳
雞人傳箭漏遲遲窓間夜雨銷銀燭城上春雲壓彩旗
才大各稱天下選書成當繼古人為

贈賈國英郎中

挺生雄傑氣昂昂服事朝家被寵光鸛鷖盃中春正好
鳳凰池上日偏長新裁樂府傳宮體舊著朝衣帶御香
忠孝兩全人所羨只今慈母在高堂

遣興二首

庭樹號蟬日已涼
塞雲橫雁夜何長
挾書萬里干明主
仗劍三年別故鄉
西北諸山連朔漠
東南衆水隔荆揚
淹留不去慙蘇子
莫遣貂裘壓雪霜

往歲銜盃意氣舒
願從章子誦詩書
已荒陶令松三徑
猶守揚雄宅一區
春樹花殘收夏果
海門潮落買江魚
如今也足成吾趣
何事侯門欲曳裾

紀夢

海上垂綸已有年
閑居無事夢朝天
蒼龍觀闕東風裏
黃道星辰北斗邊
盛際只今逢五百
前程何許隔三千
揚雄曾奏甘泉賦
應有聲名達帝前

送殷國華之饒州教授

送君行李欲何如
楚國蕭條戰伐餘
西塞人烟連草莽
南江波浪入空虛
遺民罕作先生服
故府徒存博士詩
往事悠悠多泯沒
好從黎老問終初

望海

海門東望路漫漫風颭無時縱惡湍白霧漲天陰氣盛
滄浪涵日曉光寒豈無方士求靈藥亦有幽人把釣竿
與俗浮沉何足道願乘浮舶肆遐觀

題息齋竹石

行前怪石起參差篁竹叢深使客疑如過瀟湘江上路
鷓鴣聲斷日斜西

寄題羅氏山莊

黃石山原風物幽賤子往年嘗一遊舊行屨拓已成徑

新刈禾麻應滿疇馮衍無忘白首歎謝安當為蒼生憂
餘杭溪上明日發愁殺楊花吹客舟

題先天觀圖

浩浩太古石雕鏤矜差我瓊林花飛騫寶構通鬱羅矯首
視三光丹青相盪摩上隣列仙居西移瑤池柯玉蛟亦受
令鞭撻回盤渦巍巍雙華表飛鳥不敢過玄鶴時一來潛
鱗憚伏波心迹會虛湛神光隱鳴鼉緬彼巢居子凝睇佩
女羅天風入紫京百靈莫誰何朗言渾沌後龍馬方負河

視之杳不見嘉名表山阿冥思有至理熟視猶摩挲

李竹所

題蘇李泣別圖

我去君留可奈何明朝烟雨隔關河當年胡婦分攜處
想見中郎淚更多

過采石

獨卧空山五百年喚醒除是老坡仙沉香亭北花成土
采石江頭月在天遺跡不妨留狡獪多情猶自狎嬋娟

金史卷之八
卷六
余生若在開元日也向長安學醉眠

何吾山

贈琴師趙海月五首

瓏瓏花雨客屏香理盡哀絃曲轉長海上歸來望鄉土
風回依約夢霓裳莫年鐵杖身差健何處銅盤月共將
幸自金丹堪點化不須秋樹說荒涼

倦遊何處不逢春猶記臨風度碧雲客裏看花同是夢
囊中有道未為貧黑貂裘在閑隨意黃鶴歌成莫寄人

聞有琴材在樵爨勞君妙斲一揮斤

迢遙萬里一枯槎脫畧塵凡三朶花自與秋風同客夢
曾隨明月落誰家江湖量大容浮瓠雨露春深學種瓜
却得先生有新曲如何能解理皇荂

揚柳風烟蜃氣昏秭歸花月碧蕭春水雲別後行千里
淡泊相遭得幾人見說周旋惟我我定知僵走隔塵塵
初心未證圓通悟猶恐隨身認作真

劉時中

古採蓮曲

長安女兒淑且濃
日日採蓮溪水中
笑挿荷花照溪水
韶容欲與花爭紅
溪中荷花深幾許
溪上時時聞笑語
紅酣綠縠不見人
應在荷花更深處
歸時夜涼溪水清
扣船踏歌盪槳行
荷葉蓋頭花亂鬢
溪上月明潮已平

望夫磯

望夫山頭日欲頽
望夫山下江聲哀
山頭日日風雨惡
江上不見行人回
空山亭亭幾朝暮
猶記行人去時路

知君渡河長不歸恨不當年逐君去此身化石千仞磯
石猶可懸心不移長江水涸黃埃飛行人應有歸來時

對月

涼霄在前墀佳月墮我側此月如此心曠朗一片白開
樽起相娛佳月即佳客月如感知已為我好顏色此時
還獨醒奈此明月夕

吳敬庭

古意四首

我志在栖壑而與世沉浮是非復非是此語真謬悠所
願適其適富貴何足求有酒同醉醒商歌動清秋得意
已忘辨白雲散岩幽

斜陽在遠樹微風動高荷蕭蕭湖亭上今夕涼已多遇
此素心人清言洗煩疴樽酒相與歡竟坐歡且歌揮手
謝塵世不樂復如何

夏日苦炎熱但願一夕涼及此秋氣深蟋蟀鳴近床物
情亦知時催製公子裳戶牖當綢繆歲晏饒風霜感此

發學儼終然惜流光

陰陽有代謝寒暑相推移人生百年內行樂當及時
昨日猶朱顏今日生白髭所以遺世事飲酒不復辭
寄傲南窓下千載真吾師

新春喜晴

歲序更五日人皆悅春晴官曹喜休暇
瘦馬成郊行冰消湖水綠霧散山光明
寒梅送餘香幽禽弄新聲覽物俱得時
悠然起深情蹇余佐茲邑慚負吏隱名
撫字心

金方氏人卷六
轉勞催科政何成願言兆豐年擊壤歌太平

偶成

微官羈此身遠投數千里觸暑涉長江晨夕不遑止殊
方寒氣早秋意亦如此歲月倏如流感歎成坐起繭絲
將奈何終當就料理

送吳濟川

脫穎貴毛遂投筆知班生子攜束書去而有千里程曉
袂江風寒夜枕霜月明觀光丈夫事惜別兒女情會當

拾青紫壯志酬平生

夏日述懷

屏迹遠囂紛息交歎孤陋蕭然一室間
圖史分左右瓶花皎餘春爐烟靄清晝
坐觀羽蟲化卧聞穴蟻鬪青山自偃蹇
相對如有舊我家陵峰下溪水清可漱
誤身投塵鞅三年此紆綬素餐亦知愧
民瘼未能究白雲渺何之念之令人瘦
陶令歸去來深慚着鞭後

李長源

題峽州

黃河城下水澄澄送別秋風似洞庭李白形骸須放蕩
并州豪傑為凋零十年道路雙蓬鬢萬古乾坤一草亭
八月峭陵霜樹老傷心休折柳條青

上清宮

蒼梧雲氣赤城霞錦谷鈞天帝子家仙掌高承九霄露
霓旌遙駐五雲車昆明火劫驚人世瀛海風濤撼客槎
醉裏忽逢王子晉玉簫吹上碧桃花

楊鵬翼

正旦有感

干戈短景去忽忽回首南朝一夢中
世事盡隨天道北
春正依舊斗杓東
四時玉燭堪調燮
萬國車書想混同
寂寞荒山老松樹
看渠梅柳競春風

華清宮

四海笙歌屬一家
驪山宮殿倚烟霞
燭龍正照三郎宴
野鹿偷銜第一花
大抵失人隨致亂
未知亡國不由奢

自從西蜀蒙塵後幾使殘民望翠華

頽亭

懸崖高築此亭孤落日登臨酒十壺雲破九山開疊嶂
天低三楚入平蕪斷碑黃絹空塵迹遠水白雲如畫圖
對此風烟已瀟灑扁舟何必到西湖

送真善卿歸秦中

少年錦帶佩吳鉤曾伴秦陵俠士遊沙苑草青春試馬
岳蓮雲淨晚登樓十年為客少青眼一事不成空白頭

此去何時重相見一樽聊與故人留

鞦韆

日轉簷花樹影偏謝家庭院簇神仙綵繩斜繫纖纖玉
畫板輕承步步蓮弄玉未升雲漢去綠珠先墜綺樓前
不知小徑殘紅裏明月何人得翠鈿

陳自堂

春晝睡起

柳影年華度鶯聲午夢回偶然床置易政爾席凝埃隱

几野花落閉門山雨來無人見愁緒勸把一樽開

春風

着柳成新綠吹桃作故紅衰顏與華髮不敢怨春風

先主

扶義風雲急投艱歲月長猶懷置剛子豈要負劉璋討
賊吾誰遜違天有併亡春秋復仇大萬古烜炎光

武侯

千載生諸葛餘才了十五百王已蜀佐三代渭濱師禮

樂無興日乾坤有閏時豈留文字在不愧說兼伊

曹操

鹿去卯金刀當塗未敢高爭梟猶在奕食馬已同槽身
後三分閏生前百詠勞就如題墓上盜豹亦馬逃

司馬懿

本佐賊為謀聊同漢報仇機深螳後雀禍隱馬中牛夷
甫毋專罪江生足遠猷誰開千古恨落日淡神州

送客

信履倦仍還詩生暮靄間塘蒲身共晚野鶴意俱閑送
客度流水見雲歸別山一聲長笑遠吾亦掩柴關

登岳陽樓

扁舟小繫畫欄西萬里清光一挂頤湖面欲包天外去
嶠鬟疑割海中來高空自瀉軒皇樂元氣常涵老杜詩
慶厯殘碑重回首此生何限退憂時

元風雅前集卷六

欽定四庫全書

元風雅前集卷七

元 傅習 編

劉須溪

探梅四絕

江天欲雪未雪時絕江探梅驢倒騎空中著我方成畫
亂後逢花且賦詩

釣天遠遠月斜斜歸路迢迢未到家一色白雲天似雪
和衣和雪宿梅花

後五百年無放翁狂歌醉舞與誰同
漁人入得桃花洞
猶有梅花路未通

冷蕊何心識老逋
芳名從此落西湖
風霜未改幽堅操
第一花前諱玉奴

清明日偶成

海日高高天欲斜
斷橋無復聽嘔墓中酩酊已千載
陌上清明有幾家
已老愈疎惟酒盞更晴相覓是梅花
年年春怨深如昨
莫把無涯恨有涯

劉立雪

梅

休說逋仙兩句工
冰瓠滌筆別形容
清標騷客風前立
素面仙姝月下逢
山店霜寒香撲馬
溪橋水淺影如龍
一寒盡是寒凝結
金鼎無鹽味更濃

破荒玉雪繁烟村
倚竹無言獨斷魂
三弄直須琴對越
一寒安用酒溫存
家風巢許堪同社
心事夷齊可共論
應出繡紛幾紅紫
一枝開處自乾坤

除香除影賦梅花方許詩中擅作家怕俗似嫌羔作酒
高人頗稱雪煎茶參橫屋角霜初下人倚欄杆月欲斜
夜冷玉肌愁入骨金壺移入伴窓紗

天花夜半落溪傍有寧然為取將擎爪仰空呈潔白
掀髯倒地覓昏黃脩鱗月下霜同色敗甲風前雪有香
欲起補之圖影看生愁飛入水中藏

月巖

世事從來滿則虧十分何似八分時青山作計常千古

只露巖前月半規

書燈

一點蘭膏數寸心
小窓伴我夜沉沉
暖分青燭藜烟細
喜動紅光花意深
洞見苦心歸典策
照殘幽夢入寒衾
他時富貴不相棄
移上長檠伴醉吟

玉樓夜費燭熒熒
祇得眼前歌舞明
照破三千年外事
書生元不用長檠

題靜軒

徑深寂寂鎖苔祠此地不生車馬塵夢斷瑤臺惟有竹
棋聲花院似無人蛛因門閉牢穿網鵲悟枝乾自採薪
抵道乾坤大如許不知天地又新春

寄朱約山

歲晚江空烟水寒楓林葉落楚天寬若無雁足書難寄
作盡鶯聲吟未安晉帖臨成思入石離騷讀罷擬栽蘭
老來絕被梅花惱後會君應笑我孱

登黃鶴樓

西風吹我登黃鶴白雲半在欄杆角題詩不見舊時人
惟見青山俯城郭淒淒芳草鸚鵡洲江水滾滾來無休
歲月俯仰成春秋古人今人無限愁

題醉月亭

采石江頭李太白狂不奈煩宮錦窄赤壁磯下蘇東坡
一葉泛泛凌風波當時有月并有酒和酒和月吞入口
酒腸得月冷于冰化作瑰辭喧宇宙兩首賦百篇詩千
秋萬古稱絕奇兩翁不作歸來鶴玉宇瓊樓寒漠漠若

得長江變潑醅少住人間亦差樂望圓晦缺秋復春古
來明月今來人我時舉酒問明月月亦團團磨不得鐵
如意玉唾壺我歌君和聲嗚嗚爛醉起舞嗔人扶問影
莫是李與蘇月中仙子知得無

劉養吾

別蕭高鳳

惜與可人別又貪歸路長人生有離別吾事屬閒忙沽
酒澆芳草垂鞭看夕陽眼前聽鶴語世路劇茫茫

送錢方立遊荆二首

峴山西上楚天頭，書劍區區事遠遊。
歲月如流方作客，江山信美莫登樓。
百年耆舊誰家傳，一代衣冠又古丘。
亂後題詩詩即史，未應輕付水東流。

不辭跋涉恨崎嶇，如此飄飄一丈夫。
新雨驚秋鳴草樹，行人隨雁落江湖。
歲年寧向長途老，天地何堪一室拘。
幾世中原今復合，更陪九萬作鵬圖。

揭曼碩

送馬雍古祖常御史使江西

我皇屬憂顧君子得安居孟春風且寒遺子以脩途四
牡何翩翩回首睇神都我懷正紆鬱散函忽已踰積雪
破長鬘姜者何時蘇歸彼蓮花峯上出浮雲衢白日皎
以懸下視若玄虛烟塵起西北原野無定株行者中顧
懷居者念其廬黃河洶東流西自崑崙渠四海豈不曠
切若肌與膚親賢遠讒人古以致康娛君子試多持乃
用在馳驅秦隴阻關寒歲月浩已徂鞠躬盡明義足為

世所模

宿寶應

此縣經過數中年感慨增繫舟喧夕浪聞笛暗寒燈時
俗隨同異文章任愛憎平生江海意一一賴良朋

入秦淮和曾編脩

秦淮江上送飛鴻秦淮水流西復東六朝人物已寂寞
萬古雲山空疊重明日還沾采石酒昨朝猶聽廣陵鐘
人生不似寒潮水去去來來有定蹤

泊安慶時再北遊

夜泊淮西郡寒生客子衣
酒家臨岸閉野火隔江飛
雲盡月初出潮平風漸微
昔年城下路此際正南歸

待潮

扁舟夜閣寒沙際
欹枕待潮紅日高
無數征帆背人去
海門何處水滔滔

夏五月武昌舟中觸目

兩髯背立鳴雙櫓
短蓑開合滄江雨
青山如龍入雲去

白髮何人並沙語船頭放歌船尾和蓬上雨鳴篷下坐
推篷不省是何鄉但見雙飛白鷗過

宿梁安峽夢故室有感時還盱江

梁安峽裏杜鵑啼絕壁蒼蒼北斗低雲氣倒連山影合
石稜斜闕浪聲齊南風盡日迎歸客落月空江夢故妻
一室數人分十郡百年幾處候晨雞

題花鳥圖

吳中女兒顏色好洗面看花花為悄調朱弄粉不自施

寫作窓間雪衣鳥綠窓沉沉春晝遲半生心事花鳥知
花殘鳥去人不歸細雨梅酸愁畫眉

題饒家橋上有墨龍

饒家橋下秋水深饒家橋頭黃竹林誰其濟之饒氏媼
績麻作橋橋九尋青山叢叢似吾髮白石鑿鑿如吾心
歸去秋衾續殘夢風雨滿橋龍夜吟

海棠

嫣然無在不凝脂絕世東風綵筆奇却問太真曾睡否

還應長睡馬嵬時

送趙履道虞叔常還江右

趙子我同里虞郎我同年手折武昌柳送上西江船
買魚沽酒燒荻鞭夜下西塞寒山前西塞山碧女苔君
今去幾時回東風花開春水漲待君黃鶴磯頭望君庾公
樓上

贈淳真子

蕩蕩白玉京起起淳真子十二求神仙服事丘與李嵩

洛二十載結茅白雲裏食是暘谷霞飲是玉池水鬼神
莫能識百念吹不起一朝忽騰化徑去不可遮飛馱服
五龍角巾搖三花朝發梁宋國暮宿河漢槎朝食千歲
桃暮食五色瓜長揖青牛君高歌度流沙還憇金張館
調笑許史家日食五侯鯖安能飯胡麻春風長安陌落
日邯鄲道迎人上青天送人入秋草竦身八極表天地
忽亦老寄謝區中人全真以為寶

黃尊師高軒觀鵝因留宿

開軒南岳下世事未曾聞落葉常疑雨方池半是雲偶
尋騎鶴侶來此看鵝羣一夜潺湲裏秋風得細分

夢武昌

黃鶴樓前鸚鵡洲夢中渾似昔時遊蒼山斜入三湘路
落日平鋪七澤流鼓角沉雄搖動地帆檣高下亂歸舟
故人雖在多分散獨向南池看白鷗

大明殿退朝和周待制

巍巍道德拱羲皇濟濟威儀陋漢光日射龍文宮女扇

風傳雞舌侍臣香中宵景氣浮雙闕下界歡謠動八荒
詞館小臣何以報皇圖聖壽共天長

送唐尊師祀武當

龍袞分香下絳霄羽衣承詔出清朝星臨翼軫南垂濶
神降虛危北極遙金殿壓雲開紫氣玉臺和月合笙簫
蕃釐更為吾皇祝下國時豐雨露饒

送詹師尊歸廬山

香爐峰色紫生烟一入京華路杳然雲碓秋閒春藥水

雨犁春卧種芝田詩憑海鶴來時寄劍自潭蛟去後懸
忽報歸期驚倦客獨淹微祿負中年

寄題胡氏園趣亭

日與世情遠學人聊治生畦蔬多品類樹果各生成野
老還偏數山禽近不驚詩書吾所好農圃也須明

小孤山曉發和蔡思敬韻

日落霞明錦浪翻厓傾石峭白雲間乾坤上下雄孤柱
吳蜀東南壯此關神物下移風動地仙舟曉渡月漫山

回瞻絕頂登臨處空翠溟濛杳靄間

長春宮

古樹縈紆入深宮結構牢鑿城通水繞累土築雲高輦
路行巡鶴神霄載巨鰲應逢王母使持此獻蟠桃

祖生詩

浦城孝子身姓祖自憐性命如糞土生纔五歲遭亂離
有母更被官軍虜零丁二十八春秋母縱得生何處求
天地茫茫明月恨江山漠漠白雲愁忽得母書驚母在

看書未盡淚先流書云流落河南縣河南踏遍無由見
唐州境上忽相逢白髮蕭蕭霜滿面誰知喜極情轉悲
旁人更問初別時千生萬死到今日始為母子東南歸
東南迢遞關山路入門猶記庭前樹居人傳說盡相看
雞黍提攜竟朝暮祖生子母真可憐少壯離別老大還
同時鄉井被兵者幾人骨肉能生全願生母子長壽考
四海昇平永相保

漁夫

夫前撒網如飛輪婦後搖櫓青衣裙全家托命烟波裏
扁舟為屋鷗為隣生男已解安貧賤生女已得供炊爨
天生網罟作田園不教衣食看人面男大還娶魚家女
女大還作魚家婦朝朝骨肉在眼前年年生計大江邊
更願宮中減征賦有錢沽酒供醉眠雖無餘羹無不足
何用世上千鍾祿

高郵城

高郵城城何長城上種麥城下桑昔日鐵不如今日耕

種塲但願千萬年盡四海外為封疆桑陰陰麥茫茫終
古不用城與隍

長風沙夜泊

長風沙風沙不斷行人嗟行人嗟奈君何南風正高北
風起大船初灣小船喜移船更傍大船頭不獨風沙夜
可憂更視行人好心事長江何處是安流茅舍參差數
株柳時平尚置官軍守青裙老嫗詫鮮魚白髮殘兵賣
私酒魚賤可買酒可沽他人心事知何如

羅澗谷

幼興折齒歌

秋衫未成錦機語棠梨半花鳳一羽象床雪練小龍梭
細穴銀光吐冰縷西隣郎君東海歸芙蓉半白杏雨肥
十二闌邊說幽怨勸織南浦鴛鴦飛匿蘭含蕙無消息
春醒彤霞漾玉色小龍出風雨聲奔騰觸裂雙白石白
石國城三十六女子軍來兩城覆鸞歌猿嘯強激昂百
戶風來如箭簇章臺公子真豪縱復以微言相感動郎

君切莫更癡心忍作甘心可人痛

孫伯善

去妾詞

妾昔重顏鮮抱禍十五年阿母云亡主中鎖安排翁續
驚膠絃新歸主婦情未密陡然兩意生荆棘推將怨隙
在妾身教妾徬徨留不得翁今愛妾空有心妾亦知君
愛妾深自古亡家為顏色妾身不當千黃金回首向翁
語遺子留自乳浮雪有散時人生豈長聚妾生婦肯留

妾在婦應去但願主翁琴瑟調妾身不恨無歸處

元風雅前集卷七

欽定四庫全書

元風雅前集卷八

元 傅習 編

黃南卿

梅子

水邊籬落舊精神
烟雨園林急薦新
對酒摘嘗金彈客
繞林簪戲玉釵人
一根清苦千丸雪
四月紅黃兩歲春
待得餘花都結子
東風流轉便生仁

金陵

金史卷八
卷八
采菱風急棹歌聲白鷺舟前一帶中綠水不收中夜淚
青山空掩六朝人城頭寂寞依龍阜江左興亡寄虎臣
孫楚酒樓何處在月明猶寫謫江神

湯子文

白海青

皂鵬赤鵲世紛紛羽翮何如白錦紋東海飛來一片雪
西風透入萬重雲老拳獨擊頑鵝腦俊目寧看狡兔羣
玉食所需誰可得夜來丹詔賜元勳

繡毬花

誰擲流蘇滿小園無心花萼密相聯
唐宮玉蝶團風軟
后土瓊花簇月圓
妖態欲來裊上舞
異香宜在帳中懸
試看有物渾成處
如在東風太素天

劉雲山

題雪後溪橋

老翁著脚欲渡小橋後
有奚奴搖手似言橋
險緩渡之狀

背錦奚奴指顧間雪橋如險意如閒不知此興政不淺
將謂先生跬步艱

申屠致遠

無絃琴

靜中有物即縈心物象相忘趣轉深為報柴桑陶處士
無絲爭似更無琴

趙半間

秋夜曲

寒禽認故枝
遶枝猶依依
涼螢亦知秋
飛來傍床帷
幽閨刀尺冷
遊子何當歸
脩途苦不易
庶無寒與饑
及此清夜長
為君製裳衣

憶友人李雲南

送客出荆扉
忽見青青草
故人別經時
恍惚千里道
千里故不遙
咫尺夢難到
孤鳥安朽株
行雲在晴昊
敢嘆會無期
坐念春風老

示兒

閉門避秋風開門落葉滿稚子晨發篋却嫌故衣短衣
短何足嫌掩脰尚可挽爾父故多憂爾母復不懶力作
常苦饑力織未及暖窮厄世固多榮華亦滿眼但將爾
日長勉旃事編簡

去婦詞

里有孀婦子不檢而無室既疾病乃亟為娶
且命之曰為汝娶為宗祀計也未幾而死而
子竟違母言尋出其婦婦以裋麻在身義不

得去被迫逐不可留因為詩以寫懷

落葉不返柯去婦無歸年歛袂出故幃獨影心悽然君
心紙鳶飛萬里難拘牽妾如鬢邊花未衰先棄捐憶昔
初嫁君姑病在床前歲月能幾何哀麻奉姑筵妾本辭
門去撫棺淚如泉九原會有知當為去婦憐

歲晚歐陽徑存相遇

街頭羣兒晝聚嬉吹簫撾鼓懸錦旗粉面少年金縷衣
青鬟擁出雙娥眉駸翁前驅罵母誚醜姬妬嗔狂客笑

虬髯奮戟武畧雄蜂腰束翠歌唇小眼前幻作利名場
東馳西驚何蒼皇栖栖猶是蓬蒿客須臾喚作微垣郎
新昏未已愁已作危途墮馬千尋壑關山萬里客心寒
妻子衰燈雙淚落紛然四座莫浪悲是醒是夢真堪疑
紅鉛洗盡歌管歇認渠元是街頭兒

止言

蘇張舌如戟危人亦危身期期周御史千載稱直臣清
談每敗事諧謔良損神田翁有斗酒招手聚比隣所言

惟桑麻語語不失真

戲題

十日霜勝雪開門風更緊幽齋坐寥閨寒爐火如燐驅
兒旋拾薪匆匆良可憫支頤背弓蝦吹燎唇噴蜃濕烟
涵雲霧生枝叶蚯蚓非瞽目常翳不感涕自隕居貧正
如此念之時一哂

宿村庄

涼吹搖青燈稚子供濁醪寒影忽在壁短髮何蕭騷且

持竹根枕卧聽蒼松號紙衾穩蒙首背癢不得搔須臾
作奇夢小艇飛洪濤驚覺白滿榻晴日窓前高

題十六羅漢看手卷圖

本不立文字聚看看底事一隻眼猶多何用三十二

羅滄洲

郊行

桂花無主亦清秋蕎麥為誰先白頭螢不照身嘗隱見
鷗無求世自沉浮

張周卿

鏡中燈

孤影徘徊入照臨
西風不動影沉沉
一池鉛水鑄真火
半夜金星犯太陰
雞翅舞時紅焰歇
蛾頭撲處碧光深
縱渠百鍊千燒後
依舊剛明一片心

周石源

綠陰

萬紫千紅夢已休
眼中驚見翠光浮
數聲啼鳥無尋處

幾度斜陽不入樓
潤透琴書渾欲雨
涼生衣袂已先秋
此時蒲柳還多感
莫遣西風一夜愁

王性存

書懷

九秋夜氣肅明時
見休徵泰階列六曜
湛湛平且平
蟻臣再拜祝乾坤
永清寧不學兒女態
抱拙祀雙星

有地莫種花
有堤莫種柳
花柳豈不佳
而恐易衰朽
吾情匪好異
只種竹與葵
存竹勁直操
存葵本根思

趙心遠

秋晚

一曲菱歌斷西風吹鬢髮秋隨荷葉老人對菊花閒鳥
沒疎烟外楓明落照間南山有秋色相對自怡顏

趙季文

舟中夜作

身同南雁去回首意茫然酒醒家千里詩成月滿船河
渾非為雨岸轉欲移天夜靜晶河漢涼風自斗邊

連伯正

釣絲風

短髮冷颼颼倚闌初下釣閒來片水外輕弄一痕秋淺
拂蘋花亂低分柳影浮烟波清夢遠吹不到王侯

胡尊生

送君進周公

憶君初來湖水滿才卜金鱗春波暖江南早晚雪花飛
滿帆下水送君歸霜風浙漚湖光晚白魚粳米中流飯

回首咫尺廬山雲一寸心長帆力短臨分乍覺過重關
金螺移在雙翠眉啞啞林鳥啼樹枝家人夜夜卜蛛絲
雪醅新釀都昌酒欲來不來待君久人言遠歸勝前婚
稚子牽衣婦攜手窓前紅燭宵彈碁新婚滿眼寧相思
江南今歲梅開遲贈君無花折空枝明年花開來不來
瓊花上天

無雙亭前浮冷月蕪城暗鎖腥烟黑仙魂夜吟天欲泣
巫陽下招飛玉勅神風鬼雨鞭車急一株玉雪雪中立

金瓶歲歲朝袞龍
異香蕩漾天水濃
蓬萊我我高北斗
玉佩深沉舞哀柳
瑤京三月銀雪飛
瓊仙瓊仙招不歸
釣天夜奏紫皇醉
二十四橋寒浸水

壽梅辭世

武陵老月愁黃昏
玉宮冰山無返魂
寒菴吹風鐵心裂
春顏怕見烟綃真
雪身匝地大如屋
縞衣夜醉香雲宿
孤山春去浮羅平
肯立腥埃吐瓊玉
銀河倒瀉春恩澤
幾度寒天崢老骨
便令更似八千椿
癡頑萬古終成塵

芳蟾冥茫駕蟾去烟昏雲霾夜無曙為憑青鳥別君王
後百千年歸閱世

野鷹來

野鷹來霜風高山寒鳥死孤兔逃我有鮮肉肥爾膏軟
皮為鞣絲為條山中忍饑良獨勞野鷹來高高臺歛翅
猴立何為哉當途猛虎闕我室赤精細骨皆几材野鷹
來汚之水昔年種樹今如此巢危雛弱將奈何野鷹啼
來吾望爾

陌上花

陌上花臨春暉臨安女兒吳王妃吳王沉醉香風圍金
泥為寫緩緩歸陌頭夜雨花成泥年年長花開時吳王
宮妃招不來

陌上花嬌欲語吳王妃臨安女封書寄與緩緩歸陌頭
花好能幾時錢塘之門易幾主嬌紅猶似吳妃舞吳妃
一去招不來招不來花開花落無窮期

金莖承露

蓬萊仙人騎黃鶴來遺劉郎不死藥銀漏無聲秋夜深
時見星河頭上落金精糾錯蛟龍蟠未央闕角觚稜寒
莫教仰見杯中物直是它年雙淚痕桂房椒壁蔥蘭老
留得新愁向雲表猶逐官車出漢關茂陵蕭蕭濕青草

因官伐松

大夫去作棟梁材無復清陰護綠苔只恐江頭明月夜
誤他千里鶴歸來

宋本

送歐陽炳四首

暖翠空濛故國山夢中慈母美連環文明門外春纔好
百尺吳船漾綠灣

樂聖銜盃李適之十年春夢疾如飛蒼頭零落郎君小
祖帳無知上客歸

曾侍先皇法從臣故教給札紀華勳名山久已藏名姓
莫作區區世上文

去年清問下青雲曾把文章付與君眼見皇恩絆漁隱

江湖煩報白鷗羣

孫用復

中秋前一夜賞月以明夜陰晴未可知分韻得
未字口占

年年今夜月今年今夜醉月色既已佳論圓還覺未

黃河清

題徐孺子亭

宇宙貞魂喚得醒一樽和月酹江聲看空東海有此士

高出南洲只一亭
檜色半天猶傲世
湖光落日欲吞城
蕭然四壁殘燈火
閱盡東風萬劫青

胡古愚

寄題杜隱君思學齋

先生高尚製荷衣
結屋藏書入武夷
泉石洗心無別事
皇王經世有遺思
據梧朗咏秋清夜
隱几冥觀晝永時
立志獨脩天爵貴
故應荷蕢接輿知

元風雅前集卷八